

謀佔家財強賣伯母擬斬案

刑部爲慘冤叩救事會議得安撫陳

疏稱董官係湯氏親姪湯

氏之夫董恒與子董招俱故湯氏與媳陳氏撫孤守志董官謀佔家資將湯氏陳氏嫁賣皆被搶奪俱堅不成婚等情將董官照例擬絞奏請董大毛等擬以徒流笞杖并請將強娶強賣等項逐條指明定例等因查該撫疏稱強奪良人妻女賣與他人爲妻妾者雖未致死卽擬絞罪而例內又云婦人夫亡守志逼受聘財因而致死者發邊衛充軍雖已致死止擬軍罪輕重互異等語詳繹例意一因強奪良人妻女又復圖財轉賣傷風敗俗罔知法紀故毋論致死與未致死均應擬絞一因求婚未遂逼受聘財既與強賣不同并非搶奪可比故雖經致死亦止擬軍從前定例原屬平允毋庸另行置議至該撫疏稱用強娶賣風化所關而親屬與凡人并已未姦污已未致死圖

財與不圖財例內未有分別等語查強娶之案均屬凡人如強奪良家妻女姦佔爲妻妾者絞監候此卽係姦污未致死之正律也中途奪回及尚未姦污者減一等流三千里此未姦污未致死之定例也至強姦既成本婦羞忿自盡者斬監候強姦未成本婦羞忿自盡者絞監候此又已姦污而致死與未姦污而致死之條例也此等案件或因貪色或係圖財厥罪維均從前條例已極周詳是強娶一項亦毋庸添設條款至強賣一項均由圖財而起查例內有強奪賣爲妻妾者擬絞一條又有聚衆夥謀搶奪路行婦女或賣或自爲奴婢者爲首斬決爲從絞決一條並未將已未姦污已未致死等項逐條分晰者蓋強娶者有已未姦污已未致死之分而強賣之案旣因圖財而壞人名節卽應一體科罪毋庸另爲分晰但此等案件有凡人亦有尊卑親屬若一例科斷情罪未協且旣有擬絞奏請之例又有爲

首斬決爲從絞候之例若混行牽引必致輕重失平經刑部等衙門
分晰註明并將親屬凡人量爲區別揆之情罪實屬允協應如刑部
等原議請嗣後有凡人聚衆夥謀將路行婦女肆行搶賣者仍照爲
首斬決爲從絞候之例其有並非糾夥聚衆搶奪路行婦女但強賣
與人爲妻妾者并親屬內圖財強賣者均照擬絞奏請之例至期功
卑幼謀佔家資或貪圖聘金將叔伯母姑等尊屬用強搶賣者若照
凡人及踈遠親屬一體科罪殊屬未協請照強奪良家妻女賣與人
爲妻妾之例量爲加重擬斬監候倘蒙

俞允此案強賣親伯母之董官卽照此例擬斬監候秋後處決餘仍照刑
部等衙門原議等因乾隆六年六月二十四日奉

旨依議董官依議應斬着監候秋後處決